



**DEMOKRATSKA
FRONTA**



**SKUPŠTINA KANTONA SARAJEVO
KLUB ZASTUPNIKA DEMOKRATSKE FRONTE
ZASTUPNICA VEDRANA VUJOVIĆ**

Za:

VLADA KANTONA SARAJEVO

Premijer

Ministarstvo za nauku, visoko obrazovanje i mlade

JU Studentski centar

Na osnovu člana 212. Poslovnika Skupštine Kantona Sarajevo upućujem:

ZASTUPNIČKU INICIJATIVU

za hitnu dostavu i razmatranje izvještaja o radu JU Studentski centar Sarajevo, te utvrđivanje odgovornosti Uprave za nagomilane probleme studenata Univerziteta u Sarajevu koji borave u studentskim naseljima i domovima Bjelave i Nedžarići.

Na osnovu Poslovnika Skupštine Kantona Sarajevo i ustavne obaveze Skupštine da vrši nadzor nad radom javnih ustanova čiji je osnivač Kanton Sarajevo, podnosim inicijativu da se:

- obaveže JU Studentski centar Sarajevo da Skupštini Kantona Sarajevo bez odlaganja dostavi: sve godišnje izvještaje o radu i poslovanju koji nisu razmatrani u aktuelnom mandatu, finansijske izvještaje i izvještaje o trošenju budžetskih sredstava, izvještaj o stanju sigurnosti u studentskim domovima, uključujući slučaj curenja plina u Studentskom naselju Bjelave, izvještaj o infrastrukturnim i higijenskim uslovima u Studentskom domu Nedžarići, izvještaj o postupanju Uprave u kriznim situacijama i po prijavama studenata;

Nakon dostave izvještaja, potrebno je utvrditi termin hitnog razmatranja dostavljenih izvještaja na sjednici Skupštine Kantona Sarajevo i nadležnih radnih tijela.

Također, tražim od Vlade Kantona Sarajevo i resornog ministarstva da dostave informaciju o razlozima zbog kojih u aktuelnom mandatu nije razmatran nijedan izvještaj o radu JU Studentski centar Sarajevo, te da se izjasne o odgovornosti uprave ove ustanove.

Obrazloženje

JU Studentski centar Sarajevo upravlja objektima u kojima boravi veliki broj studenata, te je odgovorna za njihovu sigurnost, zdravlje i osnovne uslove života. Uprkos tome, Skupština Kantona Sarajevo u ovom mandatu nije razmatrala nijedan izvještaj o radu ove ustanove, što predstavlja ozbiljan institucionalni propust i svjesno uskraćivanje nadzorne uloge Skupštine.

Istovremeno, studenti su bili primorani da izađu na ulice i javno protestuju, ukazujući na:

ozbiljne sigurnosne propuste, uključujući curenje plina u Studentskom naselju Bjelave, dugogodišnje loše, nehumane i neadekvatne uslove stanovanja u Studentskom domu Nedžarići, ignorisanje prijava itd.

Postavlja se legitimno i neizbježno pitanje: koga vlast štiti time što ne dostavlja izvještaje o radu JU Studentski centar Sarajevo Skupštini Kantona Sarajevo i time onemogućava javnu i institucionalnu kontrolu rada Uprave?

Izostanak izvještavanja i razmatranja u situaciji kada postoje ozbiljne indicije o ugrožavanju sigurnosti studenata ne može se smatrati slučajnim propustom, već ukazuje na izbjegavanje političke i upravljačke odgovornosti.

Skupština Kantona Sarajevo ne smije biti puki formalni organ, niti studenti kolateralna šteta nečije neodgovornosti. Ukoliko su izvještaji uredni — nema razloga da se ne razmatraju. Ukoliko nisu — Skupština mora znati ko snosi odgovornost.

Iz navedenih razloga, zahtijevam hitno dostavljanje i razmatranje izvještaja, kao i jasno utvrđivanje odgovornosti Uprave i Upravnog odbora JU Studentski centar Sarajevo, te uloge nadležnih ministarstava u ovom propustu.

Odgovor na ovu inicijativu tražim pismeno u što kraćem vremenskom roku.

Vedrana Vujović s.r.

16.12.2025.